

摘藻堂四庫全書薈要

集部

欽定四庫全書薈要

集部

止齋集卷十四

五



欽定四庫全書薈要卷一萬五千八百九十九

集部

止齋集卷十四

宋 陳傅良 撰

外制

慈福太皇太后冊寶書冊文官中大夫知樞密院事趙汝愚轉大中大夫

敕廼十有一月癸未日南至朕帥中宮從以婦子朝于重華獲陪親尊上顯號於王母永惟一朝四世非常之

休則亦二三股肱克相孝治以輯威儀可無茂恩昭示  
褒律具官某任重而道遠經明而行脩荷累朝篤叙同  
姓然自熙寧以進士對策而卿始以讜議冠群英自治  
平以儒臣本兵而卿始以雅望位三事卓爾大雅百年  
而復見之朕甚嘉焉屬茲成禮盍圖爾功維昔太任儀  
刑姜妣功在十亂德在二南於是周公推本聖子作思  
齊之詩以歌之而仲尼定為六藝傳信萬世朕今逮事  
過於成王翳卿勲曾不在周公之下疇勞進秩實應經

誼噫繼自今為國元輔永陪朕歲上萬年之觴顧不偉  
歟可

篆寶文官通議大夫叅知政事陳騏轉通奉大  
夫

敕廼者具法駕以日南至朝慈福官壽皇拜乎前壽母  
拜乎後朕帥中宮從以婦子搢圭稽首奉上寶章亦惟  
輔臣克相鉅典可無褒律以示同休具官某直內而方  
外博文而約禮及見故老在紹興文獻之間蔚為儒宗

極重華侍從之選眷言舊學簡在初潛所謂獨抱遺經  
能斷大事者矣晉預機政益行所知俾予孝治度越千  
古蓋周頌太任而不及子孫逮事之榮漢尊長樂而不  
備父母俱存之福洪惟我家一朝四世自有載籍未之  
前聞翳卿特書盡善具美噫朕式克至于今日休豈惟  
兩宮將高廟亦寵嘉之序進一官匪以為報可

前導禮義使并奏禮畢通議大夫同知樞密院  
事余端禮轉通奉大夫

敕日奉寶冊上之慈福也乘輿所過觀者萬人夾道率  
皆歸美於朕躬朕豈敢專也則亦有宅心知訓之臣克  
輯盛事可無褒寵用以示勸具官某直諒而多聞明哲  
而匪懈益退然如不勝衣而道任天下之重謙謙鞠躬  
而勇過孟賁矣從游潛邸陳誼最高晉翊鴻樞臨機必  
斷朕嘉賴焉廼者導予有儀可象肆于竣事盍啻爾功  
朕誦思齊之詩推尊文王本之太任於是益四世矣而  
周公始作大雅考引功德以昭前人未必逮事王母親

周旋揖遜乎其間也以今況古孰與朕休如卿遭時亦  
曰鮮儷繼自今卿其以予萬億年對天之休將書勞進  
秩不一而足焉尚其懋哉可

兵部尚書羅點母太淑人繆氏遇慶典恩特封  
齊安郡太夫人

敕朕觀魯詩頌僖公之有道及其壽母於以知吾卿大  
夫之賢其母氏不可以無報禮也具官某母具位繆氏  
克相君子種德云邁是生賢嗣為邦司直以點之議論



風操過魯侯遠甚則爾母視魯夫人賢何如也義不貳其夫而善祥集於晚年教行於子而淑譽聞於斯世肆朕嘉與渚錫贊書秩以小君䟽封名郡抑與魯人請命于周而後作頌者異矣尚服寵光以綏壽祉可

中書舍人樓鑰母太碩人汪氏遇慶典恩特封太淑人

敕朕觀魯詩頌僖公之有道及其壽母於以知吾鄉大夫之賢其母氏不可以無報禮也具官某母具位汪氏

克相君子為名大夫是生賢嗣世濟其美以鑰之議論  
風操過魯侯遠甚則爾母視魯夫人賢何如也爵雖從  
其夫而善祥集於晚年教行於子而令譽聞於斯世逮  
茲邦慶洊錫贊書抑與魯人請命于周而後作頌者異  
矣尚服寵光以綏壽祉可

叅知政事陳騏子臧孫遇慶典恩乞進封其母  
敕日奉萬年之觴于朕王母嘉賴爾父爰進褒律而爾  
又以錫類之恩崇大其母膏沐之邑豈不榮哉具官某

母具位某氏吾大臣內助也而及偕老方爾父夙夜匪懈熙我庶績亦惟爾母整齊家事而後得以并意一鄉不懷其私則從夫之爵雖不以癸未詔書從事晉封名邦朕何愛焉而況乎夫人獨得之也若夫可以久處約於燈火之初可以長處樂於簪裾之後凡百命婦於焉取式則此異恩又足用勸可

安定郡王子濤遇慶典恩轉官

敕維建隆磐石之宗澤流後裔維慈福奉觴之慶燕及

高年兼二者以有言進一官而何吝具官某為今屬籍  
視古典刑以孝恭友兄弟如周君陳以謹重率宗室如  
漢劉德至於試吏允也過人信抱負之不群況行藏之  
無愧比觀掌故誰其逮事於四朝強起襲封茲謂勲遺  
之一老可以華國豈惟奉祠方欽想於達尊宜亟蒙於  
殊渥假如老老亡元日之詔書祇以親親亦盛時之恩  
意明揚進律晉陟承流其茂對於寵光用永綏於眉壽  
可

慈福太皇太后姪淮東總領吳玘特轉一官

敕具官某朕嘗從上皇後恭上慈福之冊親聆慈訓勉之以學至今心不敢忘也而施恩外家久不予決甚失朕意爰趣有司上之而爾某方饒淮師序進一秩以太后訓朕之意則爾亦宜自好修以成思齊太任之美矣可

吳璫

方令奉  
常序進

吳璫

方分郡符  
序進一秩

吳璫吳琯吳錡

寓直延閣  
序進一秩

吳鈞吳鏜吳鑄

方為屬  
外臺序

進一  
秩

吳銓等一十二人

序進一官  
浸即撫仕

燕榮等九人

各以姻聯  
進官一秩

迪功郎前金州司戶青陽炳文年九十一遇慶

典恩特封承務郎

敕具官某在易之晉受茲介福于其王母而朕身親見  
之豈不盛哉餘慶溥將燕及人老俾爾晏歲齒于初官  
尚服寵榮益綏壽嘏可

儒林郎御史臺副引贊官賈忱應奉上尊號冊

寶了畢轉承直郎

敕具官某典禮行於上而澤下逮益廣愛之道也爾適幸會亦與進秩尚務肅給毋愆于儀可

朝散大夫軍器少監兼實錄院檢討官兼權考

功郎官黃由除將作監兼嘉王府直誨

十二月二十日

敕具官某朕有元子愛之固深而教之惟恐不至一時賓僚儒學之選爾以魁倫之彥久儀群玉之府侃侃正色抗論不回自少匠而為長蓋亦寵矣技巧精能非所

以望汝也橫經朱邱使吾兒有直諒多聞之益是惟休哉可

武德大夫帶御器械幹辦皇城司陳守忠係  
重華宮淑妃陳氏親父久在殿陛特與帶行遙  
郡刺史

敕具官某於重華為掖庭之親於廣內為屬韃之列矧  
惟肅給濟以靖共出入兩宮而無違周旋四姓而不競  
爰疇勞於歲籥俾借重於州麾以歡庭幃以壯軒陛可



奉議郎太府寺丞曾三聘除秘書郎

十二月二十三日

敕道山蓬萊圖籍鉅萬士夫仰望真有飈車羽輪之隔  
游其中者皆天下選也以爾力學自奮持論不阿憂國  
之心如飢如渴擢自外府徑登清貫益讀未見書以昌  
遠業且使四部秩然有序是為稱職哉可

大理寺主簿王寧新知信陽軍劉崇之並除太

府寺丞

十二月二十三日

敕寺監皆有丞而外府設官特詳焉蓋欲上裨版曹之

調度下托有司之出納不可以非其人也以爾寧文辭  
蔚然明習吏道勾稽棘寺平反為多爰俾序遷以酬勞  
勩爾崇之聲稱籍甚蚤登著庭出守邊方召對尤敏使  
還朝蹟以慰公言所貴於儒者謂其能通世務以其所  
學見之事功勉哉可

朝散大夫王進之知德慶府

敕具官某爾頃以天府貳車往守武陵突不得黔已復  
報罷朕心憫焉晉康雖遠實高皇興王之地舉以授汝

以觀汝能尚其懋哉毋替朕命可

張某知宜州

敕具官某自桂林以南之州宜為大其與蠻人隣也宜為邇置侯固圍重於他邦舉以付爾不謂之選擇而使子歟尚對明恩無乏邊事可

朝散郎充顯謨閣待制兼皇子嘉王府翊善黃

裳兼侍講

五年正月二十

敕朕每歲仲春詔諸儒講路門將脩故事有日矣比覽

名籍為之矍然昔者所進今安在耶而不為予講也具  
官某以六學之醇長於勸誦嘗發明春秋之旨纚纚可  
聽也何恙不已而憫勞以大夫之事但與吾兒游乎夫  
文帝能前席賈生於久不見之餘而武帝不能留汲黯  
於出入禁闥之日兩君治效較然可覩爾不當起為予  
講耶詩不云乎素絲祝之良馬六之彼姝者子何以告  
之此朕所以責望汝也可

從政郎建康府江寧縣尉趙汝章收使射賞轉

文林郎

敕具官某澤宮不建士無射御之習壽皇以為此非所以合文武也既策之廷中復取之園內於此皆得雋焉士亦艱矣俾進一階用為如吾詔者之勸可

降授朝奉郎權通判建康府徐堯任國子博士日奏對失儀降官特復朝散郎致仕

敕具官某闕庭之禮陵三軍者懼焉以其嚴也爾為博士長而進對失容至於鐫秩朕豈深咎爾耶丞郡亡何

聿來致事母乃謹畏過自刻責乎俾還舊官示棄前咎  
則朕之遇士大夫明恕兼矣可

福建提刑盧彥德奏泉州同安縣尉鍾安老增  
強盜希賞本州錄事叅軍從政郎鄭繼功符同  
結錄更不駁正繼功特降兩資放罷

敕具官某捕盜之賞建隆舊章也比歲吏緣為欺往往  
傳會得官縉紳數以為言而重改作將以待實能焉爾  
汝治其獄廼不審察竟以傳會之辭上之州家士師不

能治士非是之謂歟其削兩秩仍免居官尚務省循以  
蓋前咎可

前提舉廣南市舶江文叔容縱押綱官移易香  
綱錢物特降一官

敕具官某建隆舶司蓋長吏兼之尋以為有遺利也而  
專置使亦稍密矣爾領其事廼以貢輸屬汙吏然則何  
賴焉削之一官以為不謹所使者之戒可

知建康府余端禮奏武經郎李存道和糴淮西

總領所米般量少欠降一官

敕具官某峙糧以省漕此大事也而爾不究心至見劾於帥閫爰奪一階以警怠事尚其省循冀不終棄可

入內侍省東頭供奉官毛居實轉歸吏部授從義郎

敕具官某爾自謫籍得歸銓曹命之秩官往護陵寢其對恩渥毋忘懼思苟無後亦豈遐棄可

新知錢塘縣趙盛婺州通判吳璫並除職事官



三月二  
十一日

敕具官某等維昔忠獻光輔高宗以建我家維今太皇  
實佐求賢而無私謁天下誦之則以爾盛忠獻之後壽  
太皇家人也靖共在位克世其美而寘諸周行以勸勲  
戚不亦宜乎可

大理少卿許及之奉使回特轉一官

敕具官某昔臯陶明刑能弭猾夏之患爾吾諫臣也而  
為大理稽經傳古人自不寃非所謂淑問如臯陶者耶

銜命北庭且以覘國朕所為用汝也肆于歸報亶然獻忠蓋歷道其所更見至於禾黍而未嘗一語及僕馬之病朕聞之有感焉書勞增秩是特舊章若屬有鄰國之大事爾其選哉可

閤門舍人蔣介奉使回特轉一官

敕具官某使於四方孔門以為難是可以觀士矣爾以西州之彥庀職上閤意象容止亶如儒素蓋其所趣尚然也屬脩隣聘以爾輔行肆于歸報禮無違者書勞增

秩益循舊章欲究爾能嗣有晉寵可

帶御器械蔡必勝除知閤門事

敕具官某昔者仲尼設科可使束帶與賓客言者皆高弟也矧吾上閤四方於此乎觀禮而可不用士乎爾以諸生習孫吳對策為天下第一操履趨向學士大夫也壽皇嘉之駸駸膺仕朕方在潛邸每視朝輒屬意汝以為可在左右肆我嗣服首加趣召俄而銜恤迺今來歸是用命汝典我閤事夫不以寒素處私人不以學問望

右列其來尚矣自我作古追復仲尼之遺意爾其懋哉  
以圖忠報可

朝奉大夫試尚書禮部侍郎倪思薦舉不當降  
一官滿一期叙復朝散大夫

敕朕惟聽言信行雖高第不保其終身觀過知仁則寬  
朝宜諒其本意爰棄前咎俾復故官具官某蔚為國華  
簡在法從久居臺閣蓋習於推轂之風樂道縉紳亦恐  
有積薪之恨云胡吏議及此上聞廼不知猾吏之為而

徒錄名臣之後或者愛博至於言私雖薄示懲章豈遽  
忘於善類思皇多士朕所以舍舊而圖新求備一人爾  
毋為矯枉而過直可

降授通議大夫顯謨閣待制提舉江州太平興  
國宮陳峴薦舉不當降一官滿一期叙復通奉  
大夫

敕朕惟聽言信行雖高第不保其終身觀過知仁則寬  
朝宜諒其本意爰及改歲俾還故官具官某屢典名藩

久持從橐以公卿大夫之後雅有扳援則門生故吏之多豈皆決擇况重以名家之好則忘其臧狀之非及此上聞掛於吏議既往不咎朕所以舍舊而圖新永矢弗諼爾無為矯枉而過直可

顯謨閣學士降授通奉大夫知建康府鄭僑舉  
淳安令舒光改官不當降官滿一期叙復正議  
大夫

敕具官某淳安令之獄至今人疑之朕徐考其所為主

則皆吾賢卿大夫也吾賢卿大夫也而坐以繆舉之罰  
母乃已重乎以爾經明行脩為海內所稱數而閱天下  
之士多矣門生故吏必善推擇而不苟取廼者所舉令  
其具如刑書邪則與其進不保其往孔子有是言矣不  
如刑書則是即墨大夫也豈以微文而廢善類爰棄前  
咎俾還故官其繼自今母以精失士之意益舉所知是  
謂忠報可

朝請大夫中書舍人樓鑰磨勘轉朝議大夫

敕計日非所以處賢才也書勞非所以待法從也而有  
司以功令來上曰某人當進其官則朕亦重改焉耳具  
官某以文墨議論方代予言自吾與丞相執政進退群  
臣當不當功罪爾皆得以可否是正于其間分職授任  
亦異於百辟矣績用益彰聲望益茂則等而上之不過  
三數官皆將以待汝何屑屑以課日月增秩為事尚服  
訓辭以須明陟可

曾某知嚴州



敕具官某贛川之曾人物相望仕至二千石者前後以  
十數厥聲茂焉爾習于家傳有志於古試以郡寄有志  
於民還奏便朝嘉其詳練惟嚴陵之輔郡實高廟之潛  
藩分以左符用撫吾民由小州得大州益勉厥職以大  
爾家可

林大中磨勘轉官

敕計日非所以待賢能也循次非所以優法從也而有  
司以功令告是為舊章庸可廢乎具官某以直道正臺

網至于累歲以勇退紆州組殆將終更槩之懋官一階  
不足酬也況夫訓詞深厚駁議剴切朕甚嘉之乎而有  
司會課姑惟增秩其尚欽承以須殊獎可

奉國軍節度使開府儀同三司充萬壽觀使夏  
執中所生母郡夫人沈氏贈崇國夫人

敕詩人誦后夫人之賢必以為某人之子之孫之甥之  
妹蓋推本其所從來不一而足也具官某所生母具位  
沈氏作配名門雅有淑德是生賢嗣為國元舅日者朕

緣申伯之誼加錫命數視儀鬯司夫寵其身而不及其  
母豈所以宏賁外氏之祧乎是生不需膏沐之賜而死  
無以慰蓼莪之思也爰自郡封陞華上國尚歆明恩永  
綏爾後可

故妻郡夫人諱氏贈寧國夫人

敕公卿將相處貴倨之勢而不驕非獨其身賢也警戒  
相成厥有內助具官某故妻具位諱氏嘗為吾舅氏之  
配與之共隱約矣今以吾舅申錫命數視儀鬯司敬共

不違退若初筮推本所自非有如齊風雞鳴之配然耶  
夫生有中饋之勞而不及從夫之爵死祔於姑之室猶  
未離於郡小君也則吾外氏之祧尚有遺恨晉陟上國  
庸慰幽冥尚歆明恩益相夫子可

止齋集卷十四

欽定四庫全書薈要卷一萬五千九百

集部

止齋集卷十五

宋 陳傅良 撰

外制

自紹熙五年八月以後

皇后初冊封贈三代

曾祖資政殿學士贈少師韓肖胄贈太師

敕慶厯嘉祐之盛萬世帝王基業也而弼亮之功惟爾  
先正葵及奕葉嗣有象賢宜爾子孫與國無極具官某

踐修厥猷益有令聞夷險一節見於艱難高宗圖舊晉  
諸樞筦而再入穹廬將命不辱奠安宗社天下賴之然  
位不稱德有識同嘆爰有曾孫來儷宸極朕嘗以國史  
次韓之事諭諸中宮以似以續爰因追賜晉陟師垣非  
以為生蓋禮之稱可

曾祖母秦國夫人王氏贈魯國夫人魯國夫  
人文氏贈某國夫人

敕維昔忠獻身修家齊被於後昆將相三葉克對前人

皆有內助具位某氏夙以淑德嬪於相門輔佐君子繼  
世承弼永惟鵲巢國君積行累功夫人起家與享休顯  
而召南推本以為德足以配非偶然也是宜儲休載生  
賢后以綿國祚以大家聲被封於秦亦既從爵申錫於  
魯蓋取諸頌使與僖公令母千載相望豈不榮哉可

祖承議郎贈中奉大夫韓協贈太傅

勅朕聞燕齊之祀與周並傳漢之封君爰及苗裔矧惟  
韓氏之勲度越自昔於是僅三世耳而胡浸微天命弗

僭其殆再昌乎具官某於魏國為裔孫於少師子也學  
足以克家而宦不達才足以用世而懷不得試即其靖  
退足見所存集善為祥積於閨閭載篤其慶后所自生  
夫屈於名者享其實不獲乎其身者遺其後晉班公傳  
誰曰不宜雖曰緣恩亦足用勸可

祖母令人馮氏贈某國夫人

敕周人之頌任姒曰是有摯仲氏也是有莘長女也蓋  
本其所自出必名邦大族而豈無故之福母儀天下乎



具位某氏身為少師婦以奉魏祀於是浸微而不病其  
夫子之不遇敬共朝夕世守弗違餘慶流光萃於今后  
詩不云乎君子萬年景命有僕其僕維何釐爾女士言  
周之盛天命附著使生淑媛以為之妃則我式克至于  
今休蓋祖烈也亦天意也新封美號為之報本豈惟忠  
獻將吾祖宗實寵嘉之可

父朝奉大夫提舉佑神觀韓同卿授揚州觀  
察使

教詩人之誦賢后必曰是有摯仲氏也是有莘長子也  
蓋本所自來必君侯世家儲休積慶而豈一日之積哉  
具官某魏忠獻公之裔孫也踐修厥猷益自謹飭嘗試  
以事茂於材猷是生淑媛來配潛邸肆朕嗣服正名長  
秋在詩之既醉曰君子萬年景命有僕其僕維何釐爾  
女士釐爾女士從以孫子言有士行之女以為之配皆  
天意也維爾先正功在社稷德在蒼生以克及此豈非  
天乎戚里故事必在右選爰解郡紱改畀廉車宜益靖

共以綏寵祿可

母莊氏贈安國夫人

敕朕誦周南至於葛覃后妃躬儉節用服澣濯之衣皆  
其母家實為之未嘗不忻慕也具位某氏吾后母也以  
吾后作配朱邸共蘋蘩之蒞正位中宮獻種稔之種親  
事煩辱曾無吝驕則其素教豈一日之積哉夫區區侯  
邦而渭陽之思閔宮之頌必及其母況以后德流化天  
下則推尊母氏可無茂恩且與之共隱約於鷄鳴榔盥

之時而不與之共休顯於象服委蛇之際揆之經誼本  
之人情皆非稱也昨以上國為君夫人非徒示私亦足  
用勸可

少保觀文殿大學士充醴泉觀使益國公周必  
大登極恩贈三代

曾祖故朝奉郎贈太師潭國公衍加封秦國  
公

敕朕嗣守丕圖永懷元老而訪落不與於廟謀也嘗告

在廷晉爵亞傅則所以推本世系以宏賁其先正之祧  
庸可後乎具官某曾祖某躬行對於古人宦學聞於當  
世位不稱德士論惜之夫屈於名者享其實不獲其身  
者遺其後是宜燕及曾孫蔚為名臣徧儀三事光輔兩  
朝也則追錄其積行之勤增華其種德之報大啓土宇  
晉封三秦非以為生蓋禮之稱可

曾祖母潭國夫人郭氏贈秦國夫人

敕周之公孤並祀五廟以君夫人祔焉而世世享具官

某曾祖母某氏來自名門作配君子躬備勤勞以詔婦  
子而生無從爵之榮歿不得與共牢之報天命弗僭是  
生曾孫為吾輔臣弼亮奕世朕循周制寵綏爾夫誰其  
助之劬躬裕後爰因舊號俾即新封用賁幽宅尚克永  
世可

祖故朝散大夫贈太師潭國公誥封秦國公  
敕成王之雅曰周王壽考遐不作人蓋歸美文王得人  
所由來之遠也具官某故祖具官某世濟其美爵為名

臣然而德業藏於身聲聞流於時官不過五品而位止  
郎舍也唯是一經之教施於曾孫我高宗取之壽皇用  
之天下又安於是三紀肆朕嗣服獲蒙餘休非所由來  
者遠歟疇勞報本茲惟其時襲封於秦實應經誼可

### 祖母

敕朕純用周政廣恩錫類以褒大吾輔臣之世則燕及  
閨門可無追命具官某故祖母某氏儀於前人益謹內  
則載篤其慶萃於聞孫方周盛時公侯皆君子也而風

人本之衽席以是為德在鵲巢功在采蘋也我儀爾祖  
克大其後用見家政庶幾召南從爵大邦以勸命婦可

父

敕周公拜前魯公拜後父子休顯著於春秋胡我元臣  
遺恨禰廟此憫章之所由起歟具官某故父某襲美於  
家學振聲於世科而雅不善宦老於博士功業不見於  
世而文辭但以詔後人也然而過庭之訓插架之書淵  
渟駿發見於賢子經文緯武天下賴之詩不云乎維其



有之是以似之儻微申錫非所以為義方勸也爰考古  
誼襲爵為公庶幾周魯衮舄相望不亦榮乎可

母

敕朕既本之經誼為公卿崇報禰廟以侈移忠之報則  
母氏與享使之匹休亦古道也具官某故母具位某氏  
恩斯勤斯鞠我良弼譽在薦紳功在清廟夫嘗同其夫  
處約於燈火之初而不及同其子處樂於簪裾之後此  
吾大臣為之補南陔廢蓼莪也象服之弗被魚軒之弗

乘有此寵綏足慰居住配食二姑以奉祀其明享哉因  
其舊號益以新封雖曰邦彛亦足用勸可

觀文殿學士宣奉大夫致仕李彥穎登極恩轉  
光祿大夫

敕朕以眇躬嗣膺丕緒闕焉懼無以紹列聖之休訪落  
求助庶幾周成公卿大夫其將何以佐朕也具官某歷  
事三朝蔚為元老夫致位丞弼方倚為相而不為苟同  
竟於謝事昔蕭望之意輕丞相而位不過御史大夫以

為身計則不工以為道誼計多見其可尚也肆予紹服  
久矣里居以卿忠諒則敬之之頌七月公劉之風雅能  
忘於心乎爰因舊章序進厥秩亦示永懷以冀樂告可  
資政殿大學士通奉大夫知潭州王藺登極恩  
轉正議大夫

敕朕以眇躬嗣膺丕緒闕焉懼無以紹列聖之休訪落  
求助庶幾周成公卿大夫其將何以佐朕也具官某歷  
事兩朝孤立一意方其受重華之託而光輔上皇始初

之政忠言讜論不自同於衆人蓋天下嘆其難長慮卻顧不苟安於一時又天下服其遠也肆於紹休適分帥閩以卿忠諒則敬之之頌七月公劉之風雅能忘於心乎爰因舊章序進厥秩式昭永懷亦異樂告可

資政殿大學士通議大夫提舉臨安府洞霄宮  
黃洽登極恩轉通奉大夫

敕朕以眇躬嗣膺丕緒闕焉懼無以紹列聖之休訪落求助庶幾周成公卿大夫其將何以佐朕也具官某歷

事兩朝尉為故老方淳熙之季年天下晏然橐弓橐矢  
簡在宥府不動聲氣而強本折衝之功自不可掩至於  
行藏庶幾前朝孫文懿張退傅之倫矣肆予紹服適佚  
外祠以卿忠諒則敬之之頌七月公劉之風雅能忘於  
心乎爰因舊章序進厥秩亦示永懷以冀樂告可

朝散郎煥章閣待制兼侍講朱熹登極恩轉朝  
請郎

敕朕以眇躬嗣膺丕緒闕焉懼無以紹列聖之休訪落

求助庶幾周成子大夫其將何以佐朕也具官某學先  
聖之道而明於當世之務三仕三已義不苟合天下高  
之蓋累朝之所嘉嘆而不忘也長沙謀帥強為時起肆  
予初政式遘其歸處之次對於以勸講朕將虛已聽焉  
爰因大賚敘進厥秩雖曰舊章亦朕美意可

權戶部侍郎梁總登極恩轉官

敕朕以眇躬嗣膺丕緒闕焉懼無以紹列聖之休訪落  
求助庶幾周成卿大夫其將何以佐朕也具官某方以

民譽簡在從班肆予初政日月獻納而不記成王踐阼  
七月在風公劉在雅敬之在頌皆一時耆俊為之乎自  
今以始朕日望之爰因大賚序進厥秩雖曰舊章亦異  
樂告可

在外侍從登極恩贈父

敕朕方訪落求助自公卿大夫各加地進律矣則推本  
其世而褒大其家雖禮未有可不以義起乎具官某故  
父具官某生有種德之勞而位不稱歿享義方之報而

何其流之長也以爾某論思獻納著節兩朝肆予嗣服心  
在王室非忠孝之傳有自來歟增貢禰廟追錫崇階雖  
曰舊章亦以示勸可

在外侍從登極恩贈母

敕朕既本之經誼為卿大夫崇建禰廟以侈移忠之報  
則母氏與享以次申錫使之匹休亦古道也具官某母  
某氏來自名門作配君子是生賢嗣尉為從臣夫鷄鳴  
警戒之道不篤則過庭之訓不嚴蘋藻不共則甘旨不



謹爾某何以能移孝為忠也因其舊號易以新封雖曰  
邦彛亦足用勸可

在外宰執登極恩贈妻

敕昔成王踐阼世修忠厚其詩曰孝子不匱永錫爾類  
其類維何家室之壺蓋施及臣子不但其身而亦被于  
室家具官某妻某氏克相夫子蔚為宗工積行累勞致  
位孤棘惟周人克廣孝思慰滿梱內肆予嗣服繫爾臣  
隣多助之至則為之推恩燕及閨門雖祔于姑亦胙大

國非苟為私蓋周道也可

在外侍從登極恩封妻

敕朕觀二南之詩關雎為皇后鵲巢采蘋為君大夫妻  
作也則正家之化君臣一體然則力定長秋之位而可  
無以為爾內勸乎具官某妻某氏以爾夫子嘗為從臣  
獻納論思夙夜匪懈則入朝有鷄鳴之戒退食有羔羊  
之德非爾之助申錫命書晉之美號則在初政豈曰不  
宜可

煥章閣學士宣奉大夫提舉隆興府玉隆萬壽宮洪邁弟朝散大夫新知陝州遂登極恩母楚國夫人沈氏加贈魏國夫人

敕朕訪落求助自卿大夫皆加地進律矣士有能尊禰廟至官一品斯足以報本矣而母氏與享為君夫人猶視列國宜益褒崇使之匹美具官某母具位某氏聿自名門作配君子遭時不淑萬里違離而勉正勸義庶幾風人所誦汝水之墳南山之側也天命弗僭宜享後福

肆予踐阼益大爾封晉之魏邦庸示光寵庶克用勸豈徒舊章可

右丞相趙汝愚初拜贈三代并妻

七月丙子拜

曾祖某贈太傅

敕昔周公位冢宰成王為之作魯廟宣王中興則命名虎亦有秬鬯主瓚以告文人我相同姓蓋周道也推本其先以致美報可無褒典以應經誼具官某曾祖具官某躬行對於古人譽處聞於公族然夷攷其世於漢恭

憲王為裔孫於建國公為嗣子蓋屬未疏也而僅綴逍遙之班以其靖退足見所存夫屈於名者申於實不獲乎其身者遺其後是生曾孫迄為上相則追錄其積行之勤增華其種德之報朕敢忘周道乎晉陞帝傳於禮固宜可

曾祖母某氏贈申國夫人

敦昔周盛時公侯皆君子也而周召二南本之衽席以是為內助之賢德在鵲巢功在采蘋也具官某曾祖母

具位某氏出於名門作配公姓身為建國婦以奉漢祀  
於是浸微而不病其夫子之不過世無風人無所著見  
爰及曾孫篤生賢哲然則取漢上之詩以名其國為君  
夫人俾世世享亦二南之意歟可

祖某贈太傅

敕朕既質之六藝疇勞報本以褒吾相臣之祧則嗣有  
令德燕于後昆申命匹休庶幾周召並建五廟不亦宜  
乎具官某祖具官某以王公之胄而有學士大夫之習

非無富貴之階而宦不達也集善為祥聿生孝子載篤  
其慶發於聞孫詩不云乎樹之榛栗椅桐梓漆爰伐琴  
瑟忠孝之門豈一日之積哉我儀圖之宜爵公傳爰錫  
命書以賁幽壤可

祖母晁氏贈某國夫人

教詩人之頌婦德必本其家世曰是齊侯之子東宮之  
妹也是汾王之甥蹶父之子也具官某祖母具位晁氏  
盖濟陽之晁也濟北諸晁族望甚偉以其父兄子弟風

流儒雅名滿天下則爾以閨門之秀來嬪吉人克教其  
子得名篤行至於奕葉遂間兩社揆之風雅無愧在昔  
大邦美號饗此後福非以為生蓋德之稱可

父善應贈溫國公

敕朕聞之周以魯孝公訓國而漢亦謂劉德謹重使為  
太常以率宗室赫然著於史傳豈非以帝繫之餘世祿  
之及而篤行者難其人乎具官某父具官某踐修厥猷  
益自力學被服造次必於仁義而事親之孝庶幾曾閔



縉紳先生為之起敬卒於小官法不應諡而相與誌其墓曰宋篤行君子也尚論周漢豈非其倫肆其嗣子致位三事朕於是稽經據古尊為禰廟作邑於溫以寵嘉之積善之報足以不朽可

母李氏贈溫國夫人

敕以高帝子孫而再世婚姻不於勲侯貴戚而於書生是宜有子蔚為名儒度越故事以宗人相具官某母具位李氏又故丞相文正公七世孫也代有家法及爾不

違克相其夫力行孝友聚族百口曾無間言躬自勞苦  
以成永圖一簪一珥先人後已是宜發祥萃於吾相夫  
能使其夫稱於沒世而御不及百兩能使其子冠於多  
士而養不及萬鍾追錫愍章晉封大國我有異數非爾  
曷堪可

妻某氏贈衛國夫人

敕朕誦二南之詩勸以義示以正皆室家也我有近臣  
致位承弼顧其內助晚不同休可無愍章以貢泉壤具

官某妻具位某氏雖嬪王族實寒賤也晁李二姑簪珥之望奕世載德誰其嗣之而爾承休襲美無愧在昔克相夫子遂為名臣夫與之處約於鷄鳴擗盥之初而不處樂於象服委蛇之後儻微追錫得無若汝水之墳南山之側遭世不淑詠歌者乎鄱陽小邦未足言稱晉封於衛庶幾碩人以配二姑永永廟食可

翰林學士承旨李燾除寶文閣學士知婺州改

知太平州

八月三日除承旨即丐外

敕夫厭直玉堂之廬而紆郡紱士之操也閔勞豹尾之班而便私計上之恩也具位某早以英華簡在烈祖晚益蘊藉眷于上皇遭逢兩朝自守一節蓋高文大冊天下傳誦而微辭幾諫世莫得聞也肆朕纂緒人惟求舊胡然勇退曳鈴其空朕亦惟自古詞臣一視中外子羽修令無為行人相如視草嘗使于蜀朕獨可以弄翰墨苛留久處卿乎峻延閣之班均便藩之佚不以寶婺而以當塗去繁就簡冀爾整暇夫下無懷寵之心而上有

從欲之意君臣俱美不其韙歟可

正奉大夫吏部尚書兼侍讀莆田縣開國男食  
邑二百戶鄭僑明堂加恩進封開國子加食邑  
二百戶

敕朕新嗣服將有事於合宮也遠惟孝武始建漢家之  
封而太史談留滯周南不與從事議者惜之朕敢忘儒  
先乎具官某經明行修士所高仰不但擢科為天下第  
一也越從留鑰晉長天官上皇意也至朕而決迨及盛

典式過其歸蓋視漢有光焉增衍封畝第循故事方資  
告猷嗣有顯擢可

朝請郎試禮部尚書兼侍讀黃裳封普成縣開  
國男食邑三百戶

敕朕新嗣服日有事於合宮兢兢焉懼不閑於禮而無  
以接三才之奧也明乎郊禘之義治國其如示諸掌乎  
顧朕曾何以得之具官某吾舊學也切磋經誼及於春  
秋郊禘之際嚴矣有一不敬至於四卜至於改牲仲尼

正色書之以詔萬世朕所深致戒焉肆予初裡克輯盛典本所自來簡在三益徹之上田第循故事可與治國非卿誰哉可

中奉大夫試工部尚書趙彥逾封祥符縣開國男食邑三百戶

敕朕新嗣服日有事於合宮兢兢焉懼不閑於禮而無以接三才之奧也詩不云乎相維辟公天子穆穆朕嘉賴焉具官某吾宗英也使于四方拔葵之操雖天下能

誦之比冠從班賢勞忠瘁大節不奪則世未之聞也肆  
相予祀克有上儀徹之土田第循故事方圖爾功永稱  
殊渥可

中奉大夫權刑部尚書兼侍講南昌縣開國子  
食邑五百戶京鏜封開國伯加食邑二百戶

敕朕新嗣服日有事於合宮兢兢焉懼不閑於禮而無  
以接三才之奧也詩不云乎相維辟公天子穆穆朕嘉  
賴焉具官某以海內之英有言有績而執禮行於蠻貊



遺愛被於江漢往往薦紳能言之曳履從班義形於色  
賢勞忠瘁世莫得聞也肆相予祀克輯上儀增衍封腴  
第循故事方圖爾功嗣有顯擢可

朝議大夫試御史中丞謝深甫封臨海縣開國  
男食邑三百戶

敕朕新嗣服日有事於合宮兢兢焉懼不閑於禮而無  
以接三才之奧也詩不云乎相維辟公天子穆穆朕嘉  
賴焉具官某以海內之英有言有績輦下彈壓不怒而

威而回天之力見於瑣闥迺若論思義形於色賢勞忠  
瘁世莫得聞也肆相予祀克輯上儀徹之土田第循故  
事方圖爾功嗣有顯擢可

朝散郎試尚書吏部侍郎兼侍講彭龜年封清  
江縣開國男食邑三百戶

敕朕新嗣服日有事於合宮兢兢焉懼不閑於禮而無  
以接三才之奧也傳不云乎誦詩三百不足以一獻非  
深知其義者將誰與講明之具官某吾舊學也切磋經

誼及詩一編蓋自二南至我將之頌凡交神明之道反覆言之肆予初裡克輯盛典非有感於此歟昨之食采雖循舊章無言不酬於是焉在可

中順大夫守給事中兼直學士院兼實錄院同修撰樓鑰封奉化縣開國男食邑三百戶

敕朕新嗣服日有事於合宮兢兢焉懼不閑於禮而無以接三才之奧也詩不云乎相維辟公天子穆穆朕嘉賴焉具官某以海內之英綽有譽處蓋嘗久勞螭坳矣

遂陟掖垣遂躋瑣闥不愠不喜天下誦之若夫囊封牘奏備極剴切於爾取具世莫得聞也肆相予祀克輯上儀徹之土田第循故事方圖爾功嗣有殊渥可

朝奉大夫試中書舍人林大中封永康縣開國男食邑三百戶

敕朕新嗣服將有事於合宮也遠惟孝武始建漢家之封而太史談留滯周南不與從事議者惜之朕敢忘前御史乎具官某以海內之英譽處其美嘗盡忠瘁侃然

一臺之上矣越自外服晉陟詞垣式過其歸遂相予祀  
蓋視漢有光焉胙之食采第循舊章其益論思以稱簡  
擢可

朝議大夫試右諫議大夫張叔椿封永嘉縣開  
國男食邑三百戶

敕朕新嗣服日有事於合宮兢兢焉懼不閑於禮而無  
以接三才之興也詩不云乎相維辟公天子穆穆朕嘉  
賴焉具官某以海內之英綽有譽處方平居時恂恂唯

謹而侃然正色一臺之上言人所難肆予初政爰貳冢  
宰爰長諫垣僉曰汝諧也實相予祀克輯上儀徹之土  
田第循故事方圖爾功嗣有寵數可

朝奉大夫權尚書吏部侍郎孫逢吉封廬陵縣  
開國男食邑三百戶

朝奉大夫權尚書工部侍郎兼侍講黃艾封莆  
田縣開國男食邑三百戶

敕朕新嗣服日有事於合宮兢兢焉懼不閑於禮而無

以接三才之興也明乎郊禘之義治國其如示諸掌乎  
顧朕曾何以得之具官某吾舊學也蓋嘗與習禮矣每  
至於掃地而祭至敬無文凡盡內心之道反覆言之肆  
予初裡克輯盛典非有感於此歟胙之食采雖循故彛  
無言不酬於是焉在可

太中大夫權尚書戶部侍郎兼修玉牒官建安  
縣開國男食邑三百戶袁說友進封開國子加  
食邑二百戶

敕朕新嗣服日有事於合宮兢兢焉懼不聞於禮而無以接三才之與也詩不云乎相維辟公天子穆穆朕嘉賴焉具官某以軼羣之才有言有績輦下彈壓外戶不閉民曹之令郡國晏然迺若論思義形於色賢勞忠瘁世莫得聞也肆相予祀克輯上義增衍封腴第循故事方圖爾功嗣有顯擢可

中大夫權尚書戶部侍郎西安縣開國男食邑三百戶梁總進封開國子加食邑二百戶



敕朕新嗣服日有事於合宮遠惟孝武始建漢家之封  
而太史談以留滯周南不得從行為恨朕敢忘從臣乎  
具官某積有民譽晉貳地官蓋方盡瘁於朝矣銜命北  
庭越在萬里之外肆予輦裡獨不侍祠朕是以於漢事  
有感也增大食采庸示永懷曷月遄歸將有申錫可

朝請大夫權尚書禮部侍郎許及之封永嘉縣  
開國男食邑三百戶

敕朕新嗣服日有事於合宮兢兢焉懼不閑於禮而無

以接三才之奧宗伯掌禮朕之所嘉賴也具官某以海  
內之英綽有譽處方貳春官以禮紹予自省牲視滌凡  
玉幣爵之事至於告時至於告備治及竣事禮無違者  
胙之食采蓋循舊章方醕爾勞嗣有寵數可

朝散郎煥章閣待制侍講朱熹封婺源縣開國  
男食邑三百戶

敕朕新嗣服將有事於合宮兢兢焉懼無以接三才之  
奧也爰求儒先來相予祀具官某經明行修士所高仰

而越在藩服朕敢忘之乎昔者孝文受釐宣室召見賈  
誼而武帝建封顧使太史談留滯周南不與從事二帝  
優劣於是乎見此朕所以式遄爾歸也徹之土田雖循  
故事顧俊尊帝蓋庶幾焉可

止齋集卷十五


謹案卷十四第四頁前三行肆朕嘉與游錫贊書  
刊本游訛游今改

第十二頁前六行特轉一官刊本脫轉字今增

卷十五第四頁前二行母莊氏贈安國夫人刊本

脫莊安二字据宋后妃傳增





總校官庶吉士 臣 張能照

校對官檢討 臣 王鍾健

騰錄監生 臣 孫起鵬

騰錄監生 臣 葉椿

欽定四庫全書叢要

集部

止齋集卷十六

七

詳校官助教臣謝登雋





欽定四庫全書薈要卷一萬五千九百一

集部

止齋集卷十六

宋 陳傅良 撰

外制

特進觀文殿大學士提舉臨安府洞霄宮廣陵  
郡開國公食邑五千三百戶食實封一千五百  
戶葛邲明堂加恩加食邑五百戶食實封三百

戶

敕朕新嗣服日有事於合宮兢兢焉懼無以接三才之  
輿也駿奔在廟豈無辟公金玉爾音尚想故老具官某  
歷事兩朝尉為元輔蓋嘗溫恭朝夕執事有恪侍我烈  
祖爰暨上皇執珪幣見上帝者屢矣肆予肇裡均佚就  
國相維穆穆於以永懷方周盛時微子以二王之後聿  
來助祭有客頌之孝武始建漢家之封有臣如太史談  
而以留滯周南不與從事為恨朕雖不能比德於周邦  
視漢有光焉其因舊章增大食采非苟為恩蓋示不遺

之意可

在外宰執明堂加恩

敕朕新嗣服日有事於合宮兢兢焉懼無以接三才之  
興也駿奔在廟豈無辟公金玉爾音尚想耆俊具官某  
歷事烈祖蔚為宗工蓋嘗齊明盛服習於侍祠之禮矣  
肆予肇禋均佚分閭相維穆穆於以永懷方周盛時有  
客助祭詩人頌之孝武始建漢家之封而太史談留滯  
周南以為恨朕雖不能比德於周抑視漢有光焉其因

舊章增大食采非苟為惠蓋示不遺可

在外侍從明堂加恩

敕朕新嗣服日有事於合宮兢兢焉懼無以接三才之  
輿也駿奔在廟豈無辟公金玉爾音尚想故老具官某  
簡在烈祖蔚為名臣蓋嘗齊明盛服於侍祠之禮矣肆  
予肇裡均佚殊館或云越在輔郡或云越在外服或云亦既謝事相維穆穆於  
以永懷夫留太史於周南自昔浩嘆對賈生於宣室至  
今美談朕覽漢事豈能恣然於卿等乎爰因舊章增大

食采非苟為惠蓋示不遺可

張淑妃明堂恩贈三代

曾祖

敕朕有事於合宮既蒙嘉貺均休於戚里益廣茂恩眷  
言妃德之賢夙備皇宮之列爰稽邦典追賁曾門具位  
某氏故曾祖某謙和本於性資醇厚推於鄉黨善修於  
身而不享其報慶流於後而端有其原迨其三世之孫  
遂應四星之象茲盼祭澤爰陟師垣精爽如存寵光是

服可

曾祖母

敕備慈庭之妃掖象應四星敷祭澤於私門寵及二世  
具位某氏故曾祖母某氏柔嘉協則淑謹流徽好善稱  
嫺族之間種德及子孫之遠是生賢女備選皇宮慶霽  
漏泉卹章告第懿魂未泯新渥其承可

祖

敕朕肇盛禮於明堂敷大賚於天下惟慈宮之妃列夙

膺皇眷之隆加異典於私庭實率邦彛之舊具位某氏  
故祖具官某善積於已行信於人報不在於一時慶乃  
流於再世澤被女孫之淑象應四星慶霑神釐之恩寵  
齊三事茲開大國載錫愍書泉隧有光靈魂式慰可

祖母

敕熙事備成湛恩汪濊乃眷四妃之貴列於皇宮爰加  
再世之封賁其祖配具位某氏故祖母某氏相夫以勤  
儉為本燾後多福慶之儲孫枝生賢門楣遂大朝敷祭

澤邦有舊章爰改胙於營丘尚歆承於褒命可

父

敕方被神釐慶成三歲永言妃德象應四星爰加愍章  
用慰禰廟具位某氏故父具官某劬躬有慶操行靡它  
豹畧之才高於輩行鷄鳴之配出於閨門茲誕布於湛  
恩宜追盼於卹典爰因舊爵改畀新封精爽如存寵光  
是服可

母



敕朕方謹親祠恩如湛露亦懷妃掖念在蓼莪爰按邦  
彝載盼贈典具位某氏故母某氏蔚有婦德克相夫家  
凡此嬪則之賢莫匪母儀之訓生蒙象服既極寵光沒  
啓茅封又多福履茲敷惠澤更建名邦尚克歆承以慰  
冥漠可

右丞相趙汝愚明堂恩贈三代

曾祖某贈太師

敕朕觀成王踐阼肇稱盛禮而歸美辟公相維穆穆文

武宣哲燕及皇天朕甚慕焉屬茲受釐無德不報蓋周道也具官某曾祖具官某積有善祥覃及來裔是生者哲為吾相臣維周公孤並建五廟賜鬯歸胙有寵嘉資爾曾孫共輯熙事而周制亡失何以崇報爰頒異數晉陟師垣庶幾疇勞無愧在昔可

曾祖母某氏贈陳國夫人

敕周之祭澤至於既醉盛矣其詩曰孝子不匱永錫爾類其類維何室家之壺則施及臣子不但其身而亦被

于室家具官某曾祖母具位某氏克相夫子行修閨門  
聿生曾孫間我兩社朕惟周人推廣孝思慰滿闔內於  
茲初禋佐佑乃辟實維爾孫則綏以寵光昨以大姬之  
國朕敢忘周道乎可

祖某贈申國公

敕朕閱宗人之譜蓋因侍祠追錫其祖父尊寵多矣未  
有子孫致位三事而後及此者具官某祖具官某雖在  
天族猶寒畯也克世其家濟以清約是生良弼簡在兩

朝如周諸姬如唐諸李於是度越凡例及於茂恩矧惟  
肇裡澤及四海爰錫公爵作都于申其視宗牒不有光  
歟可

祖母晁氏贈吳國夫人

敕維昔宗婦不少概見而衛有碩人魯有令母於周諸  
姬獨著名於六藝豈不盛哉具官某祖母具位某氏以  
濟陽之晁來奉漢祀迺生孝子名在薦紳迺生聞孫功  
在清廟肆盼祭澤洽比幽明申命于吳增大爾邑盖與

衛姜魯母相望千載亦足為宗婦之勸矣可

父善贈溫國公

敕朕讀史至漢興以來宗室子弟無得公卿位者而坐  
耐金奪國動以百數未嘗不慨嘆也於是既祠純用周  
政策宗輔告其文人申錫名邦宏賁禰廟具官某父具  
官某以同姓而行誼篤於韋布以右選而聲聞賢於儒  
林即所躬行施及其子遂魁多士遂冠從班擢自樞筦  
經司宰事疇昔之夕相予合宮三靈具依百福來下洪

惟我家生此賢哲本支百世與周匹休下視漢事則九原可以自慰矣可

母李氏贈冀國夫人

敕朕既舍爵書勞為公卿大夫崇報禰廟則母氏與享可無褒典使之匹休具官某母某氏嘗相其夫以孝聞於四海嘗教其子以賢著於三朝日者爾子相予世室克輯盛儀而可忘所自乎因其舊號錫以新封我圖冀方用以命汝其世世享以綏後人可

妻某氏贈益國夫人

敕魯人之頌僖公至於闕宮享祀不忒及其令妻以是  
為內助之賢也具官某妻具位某氏嘗與吾相臣共隱  
約躬定省想夫蘋藻之共俎豆之飾以薦時事無或不  
虔也日者合宮而爾夫有駿奔之恭無跛倚之色推本  
內助賢於魯人我錫贊書晉封於益奚斯作頌侯邦之  
私孰如爾名藏在王府可

知樞密院事兼叅知政事陳騭明堂恩贈三代

曾祖贈少保數贈太保

敕朕觀成王踐阼肇稱盛禮而歸美辟公相維穆穆文武宣哲以克燕安甚心慕之屬茲受釐無德不報蓋周道也具官某曾祖具官某躬行對於古人汎愛聞於鄉譽而懷道不試士論惜之集為善祥覃及來裔是生耆哲為吾樞臣維周三孤並建五廟賜鬯歸胙洵有寵嘉資爾曾孫共輯熙事而周制亡矣何以崇報申錫命書晉陞帝保以義起禮亦庶幾焉可



曾祖母滕國夫人成氏贈福國夫人

敕周之祭澤至於既醉盛矣其詩曰孝子不匱永錫爾  
類其類維何室家之壺則周家忠厚施及臣子不但其  
身而亦被于室家具官某曾祖母具位某氏克相夫子  
行修閨門是生曾孫功在宗社且夫既醉非旅酬之事  
歟推廣孝思慰滿梱內況朕初禋懼闕於禮佐佑乃辟  
實維爾孫則綏以寵光為之報本侈其舊封胙以上國  
朕何愧於周乎可

祖贈少傅策贈太傅

敕朕既本之六藝不愛高爵以宏賁陳氏之祧則嗣有  
令德休于後昆可無褒典以應經誼具官某祖具官某  
當天下之清得幽人之履太史之觀風不講而文采無  
以自見孝廉之科廢而實行不上於計書也天命弗僭  
為之生孫既長樞庭又陪國論推本所自當及茂恩肆  
予初裡疇勞相祀宜及爾考並為三公荷天之休其世  
世享可

祖母崇國夫人朱氏贈福國夫人

敕既醉之卒章曰釐爾女士從以孫子言周之羣臣皆有士行之女以為之妃使生賢智子孫足以傳世具官其祖母具位某氏夙以懿行嬪于名門儀于前人以詔婦子載篤厥慶萃於聞孫夷攷其行不足以當既醉之卒章乎有崇故封未足言稱大邦美號聿從其姑質之二雅誰曰不可可

父贈少師諱贈太師

敕自亞保以來及是三葉蓋王室百年之間而劬躬燾  
後如一日也於吾宗工尊為禰廟朕豈敢嗇於禮乎具  
官父具官某義方之教不以簞金陰德之傳不以駟馬  
成我碩輔蔚為宗工緯武經文何鄉不可是不謂之賢  
考歟日者合宮有嚴美報生民尊祖視古不慙而大臣  
之禰位不稱德以卑臨尊殆非周道申錫贊書冠班九  
棘非以為生蓋禮之稱可

母杞國夫人成氏贈福國夫人信國夫人王

氏贈福國夫人

教為吾股肱之臣上自三世皆褒大之而況於其母乎  
御不及百兩養不及萬鍾也而無以慰之予心惻焉具  
官某母具位某氏承休襲美發育自躬恩斯勤斯鞠我  
良弼采蘋所共雜佩所贈恭儉精白無非教也揆諸周  
制則被以象服乘之魚軒為君夫人孰爾宜者亦視王  
母並建大邦雖曰均釐誠有以致此矣可

妻某氏封某國夫人

敕朕誦二南之詩流苴采繁相與共祭自天子達皆內  
助也仲尼序詩定為篇首寓意深矣具官某妻某位某  
氏來自名門克相夫子會朝有鷄鳴相警戒之道而退  
食有鵲巢致節儉之德日者合宮而騷也相予肆祀吉  
蠲齋明迨及竣事禮無違者則豈唯闕雉之助哉而爾  
亦與有勞矣錫之美號爰示寵光雖曰舊章實應經誼  
可

給事中兼直學士院樓鑰明堂恩父贈通奉大

夫璩加贈正議大夫

敕朕既舍爵書勞自卿大夫以次第賞矣則推其世家  
為之報本雖禮未有獨不可以義起乎具官某故父具  
官某生為才大夫而用不盡歿為賢考而何其流之長  
也屬予初禋百執事在廟爾鑰不但駿奔匪懈而發揮  
潤色凡祀之大號皆稱朕意非爾素教而克然歟追錫  
有彛爰進厥秩非以為生亦德之稱可

權吏部侍郎孫逢吉等明堂恩贈父

敕朕既舍爵書勞自卿大夫以次第賞矣則推其世家  
為之報本雖禮未有獨不可以義起乎具官某故父具  
官某生有種德之美而位不稱歿享義方之報袁說友  
章穎父  
云生為才大夫而  
用不盡歿為賢考而何其流之長也屬予初禋百執事  
在廟爾某不但駿奔匪懈而敬之顯思之戒日徹於聽  
聞也劬躬燾後非爾素教之所自來歟追錫有彛爰進  
厥秩非以為生亦德之稱可

煥章閣待制侍講朱熹明堂恩贈父



敕朕方舍爵書勞自吾從臣以次第報則推本世繫及其禰廟皆寵綏之亦祭澤也具官某故父具官某少而英發晚益深造渡江諸老多其師友嘗歷郎闥秉史筆力詆和議緒正謗史蓋官雖薄而志在於天下後世也位不稱德識者恨之屬予肇裡有嚴美報則爾有賢子勸講路門可無褒典以慰罔極之懷乎追錫崇階用貴泉壤非以為生亦德之稱可

母

敕朕既為卿大夫宏賁禰廟以侈教忠之報則母氏與  
享可無申錫使之匹休具官某母具位某氏來自名家  
克相夫子本之純厚申以敬恭其仰而事姑備極順適  
俯視媵御又何其不察察也是宜篤慶聿生賢子蔚為  
儒宗名滿天下則加以美號用慰孝思我有茂恩宜不  
汝吝可

右諫議大夫張叔椿明堂恩贈母

敕朕方舍爵書勞自卿大夫以次第賞則為之報本及

於母氏使匹休於禰廟不亦可乎具官某故母具位某氏克相太雅如商甘盤復生賢嗣如唐陽子然而生不得與於從爵之榮晚不得享夫五鼎之養儻無愍章以責幽壤何以慰爾之廢蓼莪也因其舊號益以新封雖曰邦彛亦足用勸可

妻

敕朕誦二南之詩勸以義勉以正皆室家也我有從班豈無內助具官某故妻具位某氏儀于前人克濟其美

遂相夫子為吾諍臣夫與之處約於鷄鳴榔盥之初而不與之處樂於象服委蛇之後儻無追錫得無若汝水之墳南山之側遭世不淑詠歌辛苦者乎爰錫贊書以賁幽宅可

孫逢吉明堂恩妻恭人李氏封令人

敕朕誦二南之詩至於流苴采繁相與共祭自天子達皆內助也故詩人誦之仲尼定為篇首其意深矣具官某具位某氏以爾夫子為吾從臣肆予初裡執事有恪

以朕之獲助於長秋則爾亦可以膺不失職之賞矣晉  
封美號庸示寵光雖曰舊章實應經誼可

在外侍從明堂恩贈父

敕朕既舍爵書勞自卿大夫以次第賞矣則推其世家  
為之報本詩不云乎孝子不匱永錫爾類蓋周道也具  
官其故父具官其生有種德之勤而位不稱沒饗義方  
之報而何其流之長也屬予初禋有嚴美報生民尊祖  
視古不慚而可以忘爾其之禩廟乎本之經誼追錫崇

階非以為生亦禮之稱可

在外侍從明堂恩封妻

敕朕誦二南之詩至於流荇采繁相與共祭自天子達  
皆內助也故詩人誦之仲尼定為篇首其意深矣具官  
某妻具位某氏以爾夫子為吾從臣肆予初禋克輯盛  
典則豈惟長秋之故亦爾臣工嬪婦內助其流及上則  
不失職之賞庸可後乎晉封美號爰示寵光雖曰舊章  
實應經誼可

汪大定知九江郡

敕具官某嘗為嶺南郡卓然以廉惠聞而無以旌異之  
何以勸遠吏乎九江名邦牧以選授是用命汝式賞賢  
勞益圖民庸以俟迪簡可

倉部員外郎汪梓陞郎中

八月十四日除

敕以日月為功固非所以待賢能也而功令亦不可廢  
況晉陟為郎與員外置者絕有間抑足以昭宿業勸寡  
過庸可廢乎可

朝散郎江西提舉汪遠除員外郎

敕具官某難進易退賢士之操也爾某議禮容臺浸有  
休問汲汲焉以外服為請雖留行不顧也將指奏公亟  
頒召節則舒遲累月翔集可觀是不謂之士操歟郎闡  
之選南宮最清往其欽承踐修家學可

中奉大夫提舉冲佑觀豐誼除吏部郎官奉議

郎王聞詩除考功郎官

並九月八日

敕具官某等仕至於刺史二千石亦通顯矣而浩然有



歸志是不謂廉退之操歟爾誼持節湖湘吏畏其敏而  
固稱老爾聞詩秉麾淮甸民安其寬而固諗疾朕以是  
嘉之俾還郎省分治銓事往祇成命毋有遐心可

止齋集卷十六